

西
堂
詩
集

西堂秋夢錄序

欽 蘭序三

蓋聞文聯綦組矜成都之錯綜字挾風霜薦淮南之著作落霞間清泠之曲願奏新聲迴雪進婉轉之辭誰工絕調璠璣敦琢枚叔見稱圭璧會同子山作序海內之宗已絕蘭陵之唱難追賦金陵先得驪珠願藏鱗角集鄴下竝馳驥足孰辨騏驎此皆頃刻青紅言成海市磨礪玄白文越山川者也尤子展成智辨瑯琊夢游蓬島河東三篋輦前獨奏亡書江夏一碑席上同符缺字鳳姿玉峙鸞質冰清其爲詞也麗擬雲華光齊霞赤玉繩

低轉梧桐響秋夜之音金顙平分草木變春榮之氣螭
鳴鶴怨葦散雲花蟬寂鴈歸楓吹霜葉隋曲哀傾河朔
感淒怨之姬人楚聲夢入瀟湘歎嬋媛之孤士月明懸
照澗石驚瀧風落無聲江流奔瀨音招玄羽吹臺之奏
依然客送白衣燕境之歌猶在加以兼鳳鳴之大小散
鶴唳之抑揚轉絳樹之嗾出一聲而吳曲易賈生之面
運雙腕以分詞解連城而爲鈎不減白虹之暈取照闕
以飾帶誰遮明月之光所謂接之愈淡恢之彌廣者也
惟余總角同心忘言共好守玄有志麟閣之紙誰分讀
史長懷龍門之文難繼抗心大雅飾步邯鄲折節小山

和聲鄢郢退然驚馬之齊足邈矣遊魚之振鱗式冠鏤
冰之詞用揚雕玉之美云爾

顧 敦子臨

聞之農服田力穡乃亦有秋而士獨無秋何也士以無
秋也而悲焉白日昭昭乎悲黃落之未已也夜又申以
寒夢而有秋乃十倍良農矣此吾友展成所以有西堂
之錄也彼愚者流大寐難寤視秋如春陳九辨之詞獻
四愁之句於側不知悲傷翻謂古人曾無先覺是故冠
蓋當塗者夢見山林朝台巫師祓其不祥夫是擅有白
晝良厚矣尚靳此清夜哉乃若貧士失職意氣不得揚

面目不得光悲來填膺莫可告訴長夜漫漫未嘗不三
歎而繼以泣也庶幾夢去可以無言然當夫天下之秋
颯然而至墜葉敲瓦上蟋蟀吟牀下天外鴈聲宵中愈
厲側耳遠聽蕭瑟悲澹之氣湧激枕簟間此展成昨秋
箋病而今秋錄夢皆自風霜待命林莽奔響者也而展
成不知也以爲吾方于焉西堂之北窗下徒見昔者
向榮皆已搖落而筆牀硯匣秋來無恙吾用修吾故事
而或詫吾新咏非吾所願同夢也然余三復其詞寒艷
而騷激哀樂過人所謂衆醉獨醒者而曰夢人將忌其
覺焉蓋展成意寄遠矣昔相如獻大人賦天子驚賞匪

賦爲之夢實爲之今展成視古修詞下筆妙天下不以此時金石雲陛徒令彫繪蓬蒿中黃衣人能無罪乎展成固謂此亦猶吾夢爲之初不敢以形影贈答者累人間世也是又所云文公有夢子犯占之者耶

湯傳楹卿謀

秋宜夢乎宜夢天地間以其浩澹蒼涼之氣結而爲秋而吾復以其浩澹蒼涼之胸結而爲夢則感秋之淺者無如夢矣予故驚秋客每一秋來必大索奚囊所貯往來贈答尤子悲秋之作予嘗得半焉涉茲秋此中殊不爾料簡故物如說天寶遺事徒亂人意一切束高閣於

是展成西堂秋夢錄成讀之累千百言而予默不得一語乃識此子胸中并無秋夢久矣雖然秋卽盡夢夢不盡解不見輕薄少年龍鍾老子白晝囁語黃梁醉鄉嚴霜下零猶時時作春夢九秋公事正須爲我輩平分耳今吟此卷於蒹葭秋水間得幽人之夢焉吟此卷於曉風殘月間得遊子之夢焉吟此卷於画欄香草間得淡閨之夢焉吟此卷於荒臺古榭間得桂旗蘭柅湘君山鬼之夢焉吟此卷於戍樓哀角間得金戈鐵馬烽火黃沙之夢焉聚爲秋思散爲夢境夢境千狀秋思一掬蕭蕭瑟瑟從紙上來君以快筆追而弋之無遁亡者開卷

未半輒泠然贈我秋夢矣因歎是編所有皆如吾意中
所欲言君言卽予言也盡之矣復何道我固不以君言
爲煩君亦未嘗以我不言爲怪有夢無夢了不異人則
安知西堂之秋非吾眼前之秋西堂之詩非吾意中之
詩耶又安知眼前之秋不迸作西堂之秋意中之詩不
迸作西堂之詩耶冀解此者可與涉夢可與破夢亦可
與說夢吾殆不能忘此秋夢矣則吾終不能無言以應
之矣疇昔之夜星漢橫斜手按江草在水之涯仰視仙
靈風馬雲車一葉墜露是耶非耶遂起作秋夢詩僅同
駢拇而筋脉不異聊以勾當九秋公事云爾今試手此

一編獨吟遠眺會令西山爽氣颯然兩腋間出秋空日
落夢覺兩忘臥而尋之則此一編中或浮爲碧天或凝
爲黃土或化爲住客或幻爲麗人或恍忽變態爲高山
大河明月白露藥宮紫府玉樹霓裳廢苑荒墟猛獸奇
鬼彈琴擊筑飛騎舞劍極人生涕笑難論之事浹夕而
寤連牀而寢將百出其夢以媚吾鬼以悸吾鬼以酬吾
詩料此秋之大有造於吾輩者策人間夢領天上秋練
日中詩守夜來夢雖以太極爲西堂可也豈讓西堂主
人一網打盡哉今與睡鄉約諸如此夢悉從予臥遊無
禁惟邯鄲道上人物大愚槐安國中風土浸癯無使侵

犯西堂一寸地不用命者遣偏師攻之然後攜此卷爲
入幕賓時訪西堂消息耳爲我呼趾離而告曰能如是
乎則諾

自序

吾生一夢也吾生而有形有形而有神有神而有想有
想而有因有因而有夢因之說曰因羊想馬因馬想車
因車想蓋故有牧羊而夢鼓吹車蓋者矣方其牧羊也
不知其鼓吹車蓋也方其鼓吹車蓋也不知其牧羊也
然未常夢乘車入鼠穴擣蠶噉鐵杵者有想無想有因
無因之異也推而言之因貧想富則夢珠玉因賤想貴

則夢簪纓因危想安則夢衽席因哀想樂則夢歌舞因處想出則夢山川因散想聚則夢顏色其夢也不知其夢也夢珠玉者覺而糟糠夢簪纓者覺而韋布夢衽席者覺而戈矛夢歌舞者覺而哭泣夢山川者覺而環堵夢顏色者覺而形影其覺也莫不知其夢也雖然吾惡知夢富者之貧非夢耶吾惡知夢貴者之賤非夢耶吾惡知安者樂者夢危者哀者非夢耶吾惡知出者聚者夢處者散者非夢耶夫形生神神生想想生因因生夢夢又生因想神形則凡有形有神有想有因者皆未離乎夢也無夢則無因無因則無想無想則無神無神則

無形形滅神冥想斷因寂則何富何貧何貴何賤何安
何危何樂何哀何出何處何聚何散夫然後大覺是故
其視牧羊也無異鼓吹車蓋也其視鼓吹車蓋也無異
乘車入鼠穴擣蘆噉鐵杵也昔莊周夢爲蝴蝶栩栩然
蝶也俄然覺蘧蘧然周也夫周不知周之爲夢蝶之爲
覺也而反以爲夢爲蝴蝶則未明於夢覺之說也夜夢
也旦覺也生夢也死覺也周之言曰夢之中又占其夢
焉覺而後知其夢也今人知夜之爲夢而不知生之爲
夢此終日占夢而不能覺者也故有大覺而後知此其
大夢也列子曰欲辨夢覺惟黃帝孔丘然人知黃帝夢

華胥夢風后力牧而不知二十九年與六相治天下是黃帝之夢也人知孔子夢姬公夢奠兩楹而不知七十二歲與三千子走列國是孔子之夢也由斯以談天地之內日月之下三皇五帝之大四海九州之衆其爲夢也多矣何況一人之身一秋之序窮愁疾病悲思感歎之區區介於其側者乎自吾之遭三朋也而窮猶之乎夢邯鄲也自吾之困二豎也而病猶之乎夢釣天也自吾痛故交之零落也而悲猶之乎張敏夢迷路也自吾哀中原之喪亂也而歎猶之乎淳于棼夢都邑遷徙也於是有送窮之文釋病之作五悲九歎之辭亦猶之乎

康樂夢池塘生春草東坡夢蟋蟀悲秋菊也夫夢於春者其時榮華其事繁奢其人貴顯而矜夸夢於秋者其時僚慄其事鬱抑其人慘澹而蕭瑟蓋吾甚愛吾秋夢矣豈若蘇學士一場春夢待老嫗喚醒哉雖然吾與人同夢也吾言吾夢亦夢也語云至人無夢非無夢也夢不異覺覺不異夢夢卽是覺覺卽是夢此所以爲無夢與吾安得無夢之人而與言夢

解夢語

唐孫過庭謨

嗟乎人生有夢乎無夢乎夢能幻人人苦忘夢若尤子
能夢者也尤子尤解夢者也西堂一錄實是夢中大覺
語風雨山川禽魚花草兩儀能以異夢幻人佐之以秋
益覺森森可悟今爲尤子一筆收盡天地間事皆在寸
管中快哉此子大得夢趣也達士曠觀拙人閉戶兩者
孰得孰失今尤子閉戶而得曠觀之樂風雨山川本其
性情禽魚花草供其飲食等之採芝吸露自可忘年愧
殺抱膝啣喁者窮月作經生伎倆雖然詞章一道爲傷

實多柱史五千終非聖意子雲難字有悖儒修左范之
辭近誣嵇阮之談近放李杜眉山差強人意後人以詞
章取戾者何可勝紀嗟乎此皆不知夢之爲夢也然則
西堂一集果夢耶否耶吾故幸尤子能夢尤幸尤子解
夢

西堂秋夢錄

壬午七八九月之作

長洲尤

何謨

古樂府

十三首

短歌行

歲云秋矣木葉交下有美一人或鼓或罷天清地曠山高水長四者不言使我茫茫日轡在左月馭在右我何爲哉從之奔走我有斗酒不自斟酌願醉日月及我行樂宿烏厭羽潛魚厭鱗英雄失時顧影而嘆貧鬼相責百憂入戶鵲笑鳩舞鳳皇大苦雲中仙人教我長生彈箏酒歌與福爲兄夏卜其日冬卜其夜學仙不成道可

以霸

獨漉篇

獨漉獨漉水湊泥濁犀焚其角魚驚蕭索張弓挾矢游
獵高岡遇雉不射愛子文章精衛填海飛蚊負山立志
不成歎聞於天蛇盜龍珠雲雨天下麟去苑囿以畜牛
馬抱壁獻蛟壯士不爲刈草樹棘刺其衣磨劍不用
坐而斫牀人可屠狗不可牧羊

猛虎行

秋風怒號虎走逐逐空山無人殺其草木一解牛哀變
虎搏兒食之掉尾而前不讓仲尼二解妖狐有術以媚

張寬虎信其言相對而蹲三解我行泰山婦人晝哭虎

哉虎哉有翼而角四解虎雖噬人不驚孺子我能無心

視虎如豕五解

枯魚過河泣

枯魚過河泣寄謝監河侯相濟苦不早安用萬丈流一

解

濠梁亦有魚吹沫而鼓舞謂魚且毋樂豫且不放汝

二解

何不爲神龍見首不見尾託身魚腹中制命於鱣

鯢三解

魚網嘗在水人網嘗在途吾其爲魚乎誰忘於

江湖四解

野田黃雀行二首

黃雀來何翩翩鳳凰鳴高山鶴聲飛上天黃雀決起不
得從遊步啄野田間乃遇西風萬里之鷹鷂黃雀匍伏
哀鳴乞命顛啣環鷹鷂不顧攫食果然鳴呼黃雀竟死
野田間勉哉西風萬里之鷹鷂摩翮而去前有持弓少
年

黃雀在野田田夫捕逐毋食我粟毋穿我屋黃雀不去
鷹鷂執而數其罪可戮鳳凰謂鷹鷂汝將滅我族胡爲
飲其血絕其髓抽其筋食其肉黃雀雖貪鷹鷂酷黃雀
有罪亦有功鷹鷂無功飽欲死不如黃雀在野田能食
封助之游蟲

門有萬里客行

門有萬里客來自咸陽城下馬解征衫顧我涕沾纓昔
聞蜀道難今見秦關橫不怨風波惡不畏豺狼驚潢池
多盜賊白日駕舟行百里風蕭條殺人不聞聲我發九
江口烽火蔽天生竄走榛棘中寒驢夜哀鳴有兒號哭
來追呼其父兄執手一問之傳言流寇兵惡知非寇兵
公然官軍名旌旗何煌煌車馬出帝京探囊代邊餉劫
人作家丁吏民不敢問往來有王程昔我同行客裹糧
操奇贏相逢狹路間剽奪無餘贏驅使牧牛馬且不免
敲榜所以人避之毒甚於飛蝗河北賊易去關中卒難

平吾聞長太息勸客毋西征安坐飲醇酒相與彈秦箏
婦病行

婦病不日不月願見君子一言欲言不敢多言君但往
視明鏡朱顏析無衣益無粟出門求藥探視囊中無錢
貧賤不敢悲怨所嘆弱質彫殘君復平慎自愛莫教同
病相憐亂曰勿作貧家嬾貧家嬾難處鼠穿其襦魚生
其釜有兒懷中就母索乳母病不哺兒啼最苦空房無
人羅帷飄颻蟋蟀亂鳴秋草縱橫伏枕輾轉涕泣闌干
他日相樂努力加餐

公無出門

上不能排閭闔下不能匿幽都牛馬走九州荆棘綿蠻
牽其裾北有飛雪南有封狐長人千仞玄蠡若壺覓兮
不可往況以其身相馳驅公出門僕夫悲予馬局人方
爲刀俎我爲魚肉蜜在口劍在腹殺機在目禍根在足
胡爲曳裾裸壤吹竽聾俗曷不彈鋏歸來乎濁酒一壺
琴一曲吾以天地爲廬日月爲屋清風爲舟白雲爲轂
不出門而周游乎三山十洲五嶽四瀆何用千里萬里
躑躅復躑躅

當來日大難

日苦短秉燭遊美人含笑開朱樓舞子夜歌莫愁起而

進酒飛飛羽觴女兒耳語並坐鼓簧今夕何夕明日秋風及時不樂一葉梧桐

墻欲高行

狐裘雖美不如絺綌琴雖古不如鞀枕書不如負犁人無賢否惟貴及時登徒好色不喜西施無鹽入宮自然蛾眉吾欲仰天哭旁人大笑之

落葉哀蟬曲

秋風吹木葉飛木葉落寒蟬啼辭茂樹抱枯枝晝鳴高夜鳴低露如花霜如粉月漉漉煙井井綠草垂紅欄冷翻往來孤鴻影我思美人橫空枕碧天如夢三星耿林

外急砧催夜永誰家又弄箜篌引

秋風高

秋風高高于山隨煙飛去隨雲還蘆花荻花舞斑斑舞
斑斑吹殘籜芳塵滿苑苔生閣蒼霜白露相將落相將
落勸君酒待得春來折楊柳莫使秋風吹白首

五言古

十七首

寓言二首

鳳凰棲梧桐所食者竹實竹枯鳳凰饑桐死鳳凰立不
聞啄生蟲自竄于枳棘鴟鴞啣腐鼠仰視鳳凰嚇鳳凰
非凡鳥豈可嗟來食

吾聞古神物于將與莫邪吾聞古奇人雷煥與張華人
物兩相遇豐城起雲霞人物兩相失延平走龍蛇至今
千百年斗牛光芒斜招之不肯來長嘯白水涯天下無
識者不如埋泥沙

遣興二首

子牙得玉璜漁者大笑之甯戚叩角歌市人顧而嘻一
朝登車去皆爲霸王師嚴陵亦釣叟商丘亦牧兒高隱
山水間老死竟何裨人固各有志要在遇其時所以白
髮郎三世不見知

燕雀雖能飛不能學鳳舞瓦釜雖能鳴不能雜雷鼓嗟

哉天下士乃與噲等伍大兒孔文舉小兒楊德祖號哭
尸塚間諸人如糞土我登高山巔所遇皆牧豎我行大
澤中所見皆漁父默默獨歸來悠悠顧影語

和岐亭詩二首

并序

東坡云予謫黃州與陳季嘗往來每過之輒作汁字
韻詩季嘗不禁殺故以此諷之季嘗既不復殺里中
化之至有不食肉者皆云未死神已泣此語使人淒
然也予友許孝酌昔年嘗和之令予效咏予未及應
且笑謂吾家有二十七種韭三百甕蠶消受未了何
望夢食羊羔踏破菜園乎然戒殺有年雅與許子同

志適覽坡集因和二首以告屠伯并爲我寄語髯公
刪却老饕賦也

衆人溺於口辟如蠅嗜汁挾彈逐黃雀不知衣露濕天
道本神明獨殺豈可得盤餐何雍容誰念啣刀急嘗笑
孟東野食齋猶射鴨不思人與物同遊在覆羃一朝解
十牛慘于渭水赤提網魴尾赭彎弓烏頭白可憐鶴投
毛忍見鷄墮憤君聽釜中聲游魂繞湯泣試問萬錢翁
箸下尚何缺我有咄嗟粥以供倉卒客鼓腹且行歌目
送飛鴻集

蘇晉愛逃禪長齋飲米汁子公貪異味指動唇先濕烹

雞與食蟲誰失又誰得我本藜藿子肉食非所急簷頭
養鐵馬席上睡金鴨不殺亦不放太虛爲之暴貪夫猛
於虎開口血流赤大嚼對屠門胡盧笑三白不見齊魯
間盜賊多脫幘殺人魚肉之萬鬼沙場泣造此刀俎罪
補其齒牙缺請分一杯羹往餉五侯客當願諸衆生熟
讀坡仙集

待雨

盡日厭蟬鳴聞鳩羣然喜殷雷動南山雲啣半天水涼
風滿空來草木皆驚起衆鳥急投林飛飛不能止我登
快哉亭斜倚烏皮几仰面歌北風爽氣生
軍團扇薄

不搖羅衫輕可體歸來卷殘書雨打西窗紙

獨夜

憂來畏白日頗喜夜氣淡空梁漏明月桐風翻秋衾靜
然無所思思起彈玉琴不彈琴中曲獨彈琴中心鳴蛩
皆有意能寫空山音仰觀天宇曠星斗光蕭森蒼煙所
聚處下有閬風岑我欲往從之精神遠追尋相忘澹如
此誰知世古今但恐夢中去塵境橫來侵

舟過虎丘飲茶而去

山眼爲誰青遙然若招我豈知我興闌無意停征舸只
爲乞漿來蹙向山前坐高臺靜無人紅日空林墮時聞

鳥鼠啼踏落松間果僧院不掩門曲徑蒼煙鎖萬籟并
一聲孤雲散千朵此中有清福賜與閑人可歸路迷野
塘誤聽田夫左登舟不見山却望前村火

江上歸再到虎丘

真娘墓草青闔閭池水碧今古共傷心又遇傷心客山
鬼喜我來相邀千人石千人安在哉石上鳥飛隻萬樹
綠參差晚峰青歷歷獨拖瘦竹筇拄破蒼苔跡欲問短
主簿借此幽人宅買魚楊柳渡載酒笙歌夕遙指石頭
城曦戰秋風急明月滿前溪何處尋游屐

和江月詩五首

并序

東坡序云今歲九月殘暑方退旣望之後月出愈遲
予嘗夜起登合江樓或與客游豐湖扣羅浮道院登
逍遙堂迨曉乃歸杜子美云四更山吐月殘夜水明
樓此古今絕唱也因其句作五首仍以殘夜水明樓
爲韻予又見東坡記云十月十二夜解衣欲睡月色
入戶欣然起行念無與樂者遂步至承天寺尋張懷
民懷民亦未睡相與步於中庭庭中如積水空明水
中藻荇交橫蓋竹栢影也何夜無月何處無竹栢但
少閒人如吾兩人耳又赤壁賦云霜露旣降水葉盡
脫人影在地仰見明月顧而樂之行歌且答合三說

觀之則月白風清良夜之樂爲此老獨得久矣予八
月中放廢家居頗似閒人顧抱文園之疾足不出外
戶然當孤照初升萬籟俱息徘徊窻間戀戀不忍寐
或夜深獨醒俯視月影游戲枕衾之上顧之而笑或
披衣起坐對白露泠泠曉風明滅此身爽然不知在
人間世也回問錦屏繡帳中人邯鄲一枕黃梁未熟
此樂未許知之至乃扁舟夜泊征馬曉行名利縈心
關山抱恨不能如予之澹然無事故雖知之而不樂
也然則坡老之樂予殆得其半矣所恨不及坡老者
有月無客有客無酒有酒無肴游無山水居無竹栢

大率皆無耳又何可無詩乎乃用其韻亦作五首

一更山吐月銀漢泛清瀾美人方未寐起倚小樓看簾外露花濕簾前水影寒不堪風落葉照見滿林殘

二更山吐月空閣迥無夜幽人携素樽獨酌古藤下流水自能鳴細草亦堪藉四顧何寥寥靜與白雲話

三更山吐月碧烟扶之起瑤臺露氣清十里曠如此天漢淨無塵我心空於水鏗然玉磬聲聊以代清耳

四更山吐月一點萬峰明西風憭慄直北斗闌干橫古寺亂鐘動霜橋匹馬行我夢游何處枕中不夜城

五更山吐月風氣自然幽練色掛千戶水光浸一樓羣

鷄鶩問夜獨鶴遠吟秋何處數聲笛紫雲天上謳

揖青亭晚眺

落日下寒林蒼烟洞如曉雜然雲市中數點青山小不
辨山與雲影影更相抱孤光動萬籟荒村一時擾我來
廓無聞古樹獨啼鳥黃葉卧空堦西風懶于掃秋色未
全無野花香不了平疇誰往來蕭條牛羊道不知何所
愁極目長天老我懷旣以蕪世事又相黷病骨削菰蒲
短鬚誰能好登高望天涯憂來不可考所以古至人忌
形猶木槁惆悵不如歸霜華正草草

暮秋月

嶺南氣不常涼月卽中秋此地將無同佳景爲我留重
陽風雨後新照掛西樓何殊三五夜登眺高山頭籬菊
且未放桂枝正相樛寂莫戶庭間風來捲不鈎名廉爽氣
動遠山寒光靜芳洲疑泛銀河水屈注青天流惜無一
尊酒兼之彈箏篴相對竟何物端然抱清愁此愁月不
解不如擁燈篝閉門推之去荒烟墮空湫獨坐悄無言
蟋蟀何啾啾

七言古 十三首

長歌續短歌

長歌學楚吟短歌效吳歊一聲河滿雙淚落三疊秋風

四愁孤人生少壯不得意室無懸衣金無儲西家捧心
逢嫫母東方索米遇侏儒昔嘗學書今學劍我欲鼓瑟
人吹竽辟諸方柄內圓鑿何異北行指南車意氣坐爲
時命厄春蘭化作秋蓬枯今之相者視肥瘠知有貴賤
無賢愚好官皆由人笑罵貧士獨爲鬼揶揄腰間不繫
三尺組肘後安用萬言書吾欲出門無去路不如歸卧
南山廬君不見青蓮居士水晶宮裏住隴西公子白玉
樓中居天生奇才人不識相與投棄山川隅孰知上帝
咨嗟老龍怒招之歸來升天衢頂摩青穹弄白日俯視
一世如孤雛咄哉吾所與游皆子類白乎賀乎天下未

嘗無

何不歌

君何不乘天上之紫霞飛來飛去仙人家又何不踏水
中之碧月洞庭歌舞開珠闕徒然寄生天地如蜉蝣又
何不左携黃金篋右持白玉鉤不然釣魚東海上不然
射虎南山頭數者不成復不去章縫自號儒家流朝吟
而暮謳不知迂濶何所求神農虞夏忽焉沒安敢大言
稱伊周又不生于七國縱橫日驅車歷說東諸侯邑邑
閉置甕牖內聖賢爲吏詩書囚車中有七尺車前無八
騶手指青雲從之去忽然失足墮泥溝功名富貴爾何

物其力能與文章讐雲臺麟閣高于天吾家蓬蒿自相
樛不如仗劍從軍行貂蟬皆出於兜鍪或云田家樂我
將荷耒耕西疇念此故物如鷄肋棄之可惜食之差出
亦愁入亦愁西風八月哀凜秋浮雲颺忽白日暮惆悵
不敢登高樓君不見昔年筆冢土一坏今日纍纍成山
丘何況人生幾何不白頭

奈何歌

東家有處子持色未授人自言弱質稔芳節含情不敢
窺西鄰十年無所字華落如飈塵昔日蕩子顧之笑今
日老叟聞之嗔兒女猶貴托身早飾況丈夫有志立功

勲三十二年當中指一再下儼然公我欲代悲白頭
翁童子笑我將無同鬚眉如戟尚寂寂饑來吞字若秋
蟲夜眠不敢對明月晝坐不敢迎清風只恐風月見我
笑慷慨悲歌空爾雄大抵奇士多淪落何獨戚戚哀塗
窮哀塗窮可奈何仰天一笑天么麼小兒顛倒安足道
置酒且作開愁歌

春風舞歌弔何澹玉

并序

予客江上交毘陵莊芭燕芭燕爲人豪蕩不羈工詩
賦兼善扶鸞因爲予言虬仙何澹玉澹玉武林妓才
色雙麗年十八卒故有亾年纔十八死託杜鵑根之

句又云酒鄉過一世花苑活三生其人放誕風流可
見又一律忘其首句後云數曲琵琶絕妙詞看盡青
衫惟有淚燒殘紅燭不成詩半簾梅影無君瘦千古
情人是我癡可惜臨歧分付語至今湖水笑相思又
有歌云春風舞春風舞吳姬紫玉飛作煙越艷西施
化爲土此首最佳而芭燕憶之不全惜哉芭燕常作
別院書武林何澹玉神主以一炷香供之他日其紙
爲旋風吹起繚繞爐煙之上視之有小影焉約掠湘
鬟翩躚舞袖如片月離雲疑欲乘風飛去至今跡稍
減猶髣髴可圖也然澹玉竟以是日辭去嗟乎澹玉

不幸芳年葬玉殘香剩墨散佚無傳幸而降箕芭燕
家如洞口桃花片片流出又不幸而芭燕所記寥寥
僅得此徑寸珊瑚不無遺恨然猶幸而予及見之爲
玉臺新咏增一佳話不與斷釵蝕襖零落歸山丘也
乃賦詩弔之卽以春風舞命篇

春風舞朝舞雲暮舞雨雲飛雨散風無處昔日錦屏人
長短鴛鴦譜今日夜臺客冷煖臙脂土吳宮姬越溪女
素衣如夢玉如煙千載重逢斷腸侶美人窈窕楊柳年
趙瑟秦箏手解語枇杷花下醉紅裙燕子樓中歌白紵
一朝淡葬青楓根荒壠年年啼蜀宇誰知天下有情人

離魂猶作芙蓉主。鈿車遊戲到人間。張郎幸遇湘江杜
黃子。坡頭詩句新。白鶴飛來歸何許。只今片影。西畱仙
舞袖。弓腰削翠羽。相思無路喚真真。霧鬢風鬟爲誰嫵。
君不見蘇娘家住錢塘汭。犀簪唱徹黃金縷。又不見青
娘墓。築孤山。豎春衫。血點紅顏薄。風流宜與何娘伍。三
生一笑相爾汝。他年載酒賦招魂。舉盃澆遍西陵浦。

擬補劉妙容宛轉歌六首

并序

續齊諧記載劉妙容事云。宛轉歌八首。王敬伯憶其
二。今讀其詞。幼眇悽愴。使人惋泣。惜六曲之不傳於
後也。擬作補之。嗟乎青陵華山雀臺燕塚。古今傷心

如妙容者不少矣然而彩雲竟散笑石難逢崔娘水
畔兒不乘車蘇小門前郎誰騎馬悲佳人之薄命思
倩女之離魂雖欲如妙容之金釵扣絃繡囊贈客安
可得耶予故弔妙容又不僅爲妙容作也

夜未央西山煙正長塚中鸚鵡話春雨臺上鷓鴣啼秋
霜歌宛轉宛轉不成聲願爲琴與瑟交交鳳凰鳴

月欲斜覓今天一涯鬼雨無聲灑空草秋風如剪碎煙
花歌宛轉宛轉不能長願爲衾與枕周旋君子旁

紅淚殘錦衾斑復斑紫玉明珠爲君贈湘娥冰絲手自
彈歌宛轉宛轉曲未終願爲雲與雨往來春夢中

酒一盃筵篴且徘徊衰燈照壁不成夢繡襖落花飄作
灰歌宛轉宛轉絃復斷願爲車與馬從君上河岸
奈何許碧血蝨黃土高臺多風鳥不飛空林無人月自
舞歌宛轉宛轉腸應直願爲楊與柳牽衣送征客

天已曉低迷南山道桃枝驚隨桐葉飛春條青青變秋
草春條大婢
桃枝小婢歌宛轉宛轉繼以泣願爲月與星夜夜同

出入

夢天 和李長吉韻

九關擊鼓催月色西風一聲榆錢白玉宮遙遙閉紫煙
仙妾吹笙桂花陌我步天階盤盤下帝遣雲童駕車馬

口吸銀河萬丈流洗出愁腸望空瀉

焚香二首

風雨忽來秋自語虛房靜靜身如旅小鴨端眠未識寒
香心將盡香絲舉鬱然媚我羅衣紋欲煙不煙雲不雲
穗燼已滅氣猶住清息惟通寂者聞

畫香酣酣噴襟褸夜香漠漠疑氈氍幽人鼃鼃無所艷
不與彤奩鬪青朱坐看金鳧食蕙草白雲竟去蒼煙老
胡牀秋夢未醒時愁心一縷從之裊

五言律 二十二首

秋夜

夜氣一蕭瑟夢深如小年殘燈熒淚影落葉動哀絃黯
若書空客枯于面壁禪晨鐘何處到百感盡茫然

蟬

無口不能默有身亦善藏哀傳天子曲嬌助美人粧唱
和山南北較量日短長吾心澹無夢任汝喚炎涼

螢

小草生清照幽窗借遠輝去隨楓葉落來近鬼燐飛壁
暗衣常濕夜深光易微忽然隱蘆荻燈火出漁磯

蜘蛛

網羅天下滿微物又何知一面懸籬下三遷到樹枝人

言喜有驗吾歎隱堪師怪爾愁多少心中成亂絲

促織

昔見布穀鳥今聞促織蟲
篝車何日滿杼袖此時空
蘇蕙迴文艷班姬禱素工
吾家亦舌織匹錦割來窮

失意

嗚咽白日下悲覓無不之
吞聲憎舌在顧影畏人知
明月滄江夜深山風雨時
夢來猶惻惻應共鬼吟詩

病信

并序

余素善病三秋之際係戀尤深
今年春夏可幸無恙
人秋旬餘遂得河魚疾家人語予曰此病信也予笑

領之爲作一詩

病信何時到秋風此夜深相思千里夢獨寐五更心羅帶初消束霜花欲上簪茂陵人寂莫枕破鳳皇琴

棄置復棄置二首

并序

予失意後再走江上已沉船破釜甑斷歸思而十上不行三黜仍去命也如何出江城道九里灣過大小青楊風景慘澹行李蕭條江潮夜至孤舟又東咏孟東野棄置復棄置詩泣數行下因用其句成二首亦歸以示江東父老而已

棄置復棄置孤帆竟此征一盃酒耗睨半枕夢縱橫欸

乃聲如歎咄嗟書不成青衫幾點淚應共夜潮生

棄置復棄置天涯一病身江山多逐客風雨半欺人行

路思親老

老父與予同至江上先入南都

歸家憐婦貧白雲亘南北極

望涕沾巾

夜行

一棹搖江月西風軋暮鴉空山驚鬼鳥古墓落松花鼓

角吟秋冷星河入曉斜慚覓無處去不敢夢歸家

入門

入門須日暮歸棹故遲之稚子牽衣笑家人剪燭疑莫

言淪落苦且慰別離思珍重西風夜閒愁易上眉

續病信

萬里西風雁來傳二豎書雨鳴秋草靜人語夜堂虛煮藥嫌煙濕添衣怯簾疎詩腸愁應小覓句已無餘

荒園

荒園成古道風物易爲秋烏夢驚黃葉人愁疑白鷗芙蓉香自秘蟋蟀語相酬斟酌晚寒重歸家問敝裘

草

試望江南陌芊芊芳草屏吳煙織嫩縷楚雨潤幽馨燕冢愁深碧銅臺傷淺青西風特愛護書帶滿閒庭

蕉

葉葉西窗舞聲添夜雨孤水仙搖竹扇山鬼剪羅襦風
展書僧紙雪飛回客圖吾家有秋夢逐鹿笑樵夫

苔

石髮碧于水垣衣綠上厓秋生子建閣夜沒景玄堦游
屐斜封印花覓半活埋不如裁側理可以賦幽懷

萍

猶是楊花意飄然老此身江湖常寄旅日月自沉淪秋
到供鴻膳風生動鴨茵天涯竟流落何處採蘋人

望雁 并序

月令仲秋之月鴻雁來季秋之月鴻雁來賓今十月

矣而雁聲杳然吾疑其信也故望之

南北烽煙隔關山無雁臣天連蘆荻斷野藉稻梁新竟
作浮沉客長辭羈旅人深閨應有夢問字到江津

登靈巖二首

山中暮氣出石逕杳然涼萬樹涵湖白孤鴉帶日黃人
同秋色靜心入梵聲長欲問興亡事愁煙沒大荒
獨立俯浩野人閑山亦空故宮秋草外遊屐夕陽中斜
古浮屠小湖高石嶼窮相看歸鳥盡猶自倚西風

登涵空閣二首

兀然此空閣無處不蒼煙宿莽當三徑疎星亘一天蛩

吟靜于默客意遠如禪欲語不可道林中清磬傳

我夢曾登此如浮震澤舟

東坡詩云我夢扁舟浮震澤予少夢登山見日月二井今

至靈巖恍若舊游乃知坡老知

憾堂九十二級了不異人意耳今來閣外望反意夢中

游山爽不知夜煙深別有秋他年竟應住石上弄清流

七言律

十八首

披襟納爽因話清涼佳境和卿謀韻

襌襪子客未曉事羲皇上人將臥游獨當高臺明月夜
遙望落木空山秋烏鵲三匝碧雲浦紫簫一聲黃鶴樓
悠然此夕不知寐坐待朝爽來颺颺

偶歎和卿謀韻

海上持竿釣玉虹，怒來彈血不成公。生憎狡兔謀三窟，倦看醯鷄鬪七雄。壯士常出人跨下，諸君何入我禪中。此言狂甚不足道，且向林間對快風。

獨眠

獨眠不眠驚秋雨，檻外修竹打甘蕉。一一水雲渡橫浦，雙雙野鳥啼小橋。自燒木葉藥煙澀，不捲湘簾紙帳飄。倚賴西風理清課，何須造作病夫謠。

病中寄懷卿謀

相儔鍛羽又離羣，此日愁心不可云。養疾頗同王處士，賦詩常憶鮑參軍。世人皆讀錢神論，吾子猶稱辨命文。

卿謀索子造
問子平故云

何似大家尋夢去南山雲對北山雲

病起

特爲西風加一餐又聞零露怯衣單
秋來景物難爲夜愁裏山川易覺寒
荒草自封三徑在亂蛩相弔九歌殘
庾家枯樹今堪賦楊柳依依不忍看

過卿謀齋同子定飲話

與君兄弟話綢繆便自蕭然當一秋
歲月不居人聚散山川多事世沉浮
黃金臺上新郎貴初見南勝白玉樓中故
友愁卿謀示子陸子輓章感爾百盃千日酒
直教醉夢到滄洲

哭陸靈長八首

我今慟哭上高臺四野無人鳥雀哀千里江流隨淚下
六陵雲氣擁冤來秋風此日吹文冢明月何年照酒盃
開卷似聞君歎息一箋名紙半成灰陸子作秋箋序有
今日照我尊中酒
明日照我北邙松之句

與子論交七載餘何期一別隔丘墟空梁落月思顏色

午夜挑燈哭素書叢桂飄零人不見

庚辰秋予寄懷陸子有云前軒訪海

棠後軒訪叢桂予之故人卽君之故人也今桂已放矣陸子竟作故人耶薜蘿剪拜室長虛

庚辰春陸子有別薜蘿詞云青苔寂寂鎖空階疑是竟
今往來處桂子蘭孫而今安在立孤難耳直白作訣語

閒居是處堪惆悵况復山陽過舊廬

捉月長眠采石磯野萍飄泊竟何依

陸子南行買一籍
題曰野萍日錄亦

不詳

青陵遽斷閨人夢白髮猶思游子衣遶鶴飛來城

郭在杜鵑歸去歲華非夜溪慰哭庭前樹淚洒西風露

欲歸

九月朔夜陸子尊人暨處實燈下簡閱遺書忽聞鬼哭聲甚哀諦聽之則靈長生前語音也

雨花臺上謁荒祠破蘚曾題懷古詩

八月九日陸子游雨花臺弔方正學

自此

絕筆孝友文章君不愧山川草木我重悲江潮咽盡招

魂賦野鳥啼殘墮淚碑地下若逢諸義士爲言有客弔

湘纍

今春予作壬午諸臣論贊陸子以建文書法致予備攷

潘郎向日悼楊侯誰料傷秋并一丘

潘岳懷舊賦爲婦翁楊肇及舅楊潭

楊韶作客冬徐季美卒今春徐卿鄂卒陸子經紀兩喪捐卹備至自夏徂秋而身隨盡之悲夫

白首同

歸歌薤露青衫獨濕歎浮漚孤兒未立甯遺恨

魯野菴孤托之

陸子未見成人身先謝世立孤難耳豈謂是哉

故友重逢話鬼愁回首舊遊真

一夢難尋李郭共仙舟

已卯夏予與卿鄂靈長同舟起鹿城試對牀數日復並載而歸

昔日芙蓉石與丁君今何主在秋心

陸子作克愁錄有秋心圖謝連

不夢池塘草蔡琰空傳焦尾琴

靈長無子止一女在襁褓中

帝遣青

蠅作弔客人聞白鶴助哀音斷腸桃葉年年月獨照寒

江客淚深

悲哉四子祇存三

予與卿謀二陸盟四子社

編曲彈琴益不堪野樹

獨憐左伯死竹林誰共阿戎談

辛巳春七子游虞山嘗戲陸子爲阿戎叩

棺何及思懸劒漬酒空然愧脫驂他日墓門重執紼北

邱松柏一時南

陸子觀至河干予尚未知不及素車奔喪僅與卿謀望空酌酒哭之其室

一卷離騷殉殞宮湛湛江水泣秋楓死同才鬼歸天上
生看璧人埋土中君探嶺梅尋鄧尉陸子先塋在光福嘗約予買舟入山
爲梅花土人我攀堤柳問蘇公予與陸子有西湖之約夜臺如憶前生
約花落棠梨凝血紅

弔吳宮二首

西山落日照蒿萊吳越春秋土一堆結綺煙消餘舊井
朝雲夢冷獨荒臺無情野鳥採香去有恨霜楓凝血開
古寺幾時今半廢况教宮館不塵埃

鸞簫蛟瑟一時灰鹿走鳥飛空爾哀萬點土花飛碧莽
雙鉤羅襪臥青苔髻螺影自湖中出環珮聲從林下來

借問素衣人在否王軒詩句我能裁

哭陸靈長墓二首

鳳凰山上煙茫茫白日之下飛青霜
大鳥朝鳴弔鶴死孤桐夜嘯哀
琴亡千年滕公居此室萬世豎子歌其旁
勸爾不須歎短命土中何處分彭殤

慷慨悲歌此盃酒送君永歸青松堂
衣冠不同草木腐魂鬼自共山河長
莊子一朝化蝴蝶韓朋千載啼鴛鴦
我銘石碣秋風裏當與日月爭滄桑

七言絕

五首

秋宮詞二首

素粉累恩不見紗金盤露濕桂宮花君王夜入清虛府
新賜嫦娥號麗華

飛鸞輕鳳並芙蓉歌舞臺前寶帳封只恐軒羅易吹去
宮人不許唱迴風

戲咏秋海棠

秋風初試粉紅衫淡倚屏山靜可憐正似美人睡未足
一經暮雨倍嫣然

月夜二首

竟夜西窗不敢關恐驚明月入深山一庭竹柏亂秋影
疑有幽人獨往還

暮雲欲青煙欲碧明月飛來四天白池塘蟲語細如絲
彈盡秋聲人不識

昔白司馬聽商婦琵琶始覺有遷謫意凡聲不足感人者必無情之物也而況於言爲心聲乎況於言之深者感而爲詩乎展成胸中有秋因感秋之氣而成此編開卷一吟便有萬斛秋聲逼人襟袖不啻琵琶數疊飛入江聲風露浩然霜月自下奚囊中殘楮數寸化作楓葉荻花秋瑟瑟矣予入秋來百不關情惟擁一領青衫珍重病骨雅不欲聽哀蟬落葉消受淚痕及讀此編始覺有傷秋意紙上煙雨無數忽忽沁入心骨乃識此編之感人深於秋氣矣予又安能使胸中之秋不出而相應耶因感秋夢遂作詩云心事如雲不斷流夢覓何處寄

虛舟從遊帝子芙蓉渚去弔王孫松柏丘萬里碧天噴
落鳬千年黃鶴笑浮鷗歸來煙草蒼蒼滿吟作西堂一
夜秋成此詩時寒煙繞窗白天如水林外宿鳥淒然欲
墮不減江州司馬譜琵琶行時也今秋且西歸手此一
編清風明月便堪把晤卽以作我輩西堂可乎天下之
秋當與天下夢之惜無大小忽雷共寫其聲於修江浩
月間令有情無情一齊淚下耳傳楹再題

十月庚戌秋盡之夜予坐小齋殘燈明滅霜風颼然隱
几假寐夢一青女邀予西行所至曠野蕭條沉陰黯澹
四面皆秋聲青女告予曰此西顓國也入其門門曰白

藏登其堂堂曰素商堂上有人衣白衣服白玉貌如古
帝王予拜之帝問曰子非西堂之人與予曰然帝曰朕
白帝子也帝命主西方頃者趾離之神以西堂一編至
朕讀而善之昔蘭臺才子河陽少年爲吾國兩修文得
子而三耳今朕將西歸故與子別且請爲驪歌予謝不
敏帝笑曰朕爲子召書記亡何有四人前各言姓名曰
楮國公毛刺史玄香太守卽墨侯予驚曰公等何自從
白帝子游乎四人皆曰向帝命勾當三秋公事故間侍
子帝行吾亦從此逝矣于是帝屬予爲辭四人者書焉
予乃賦詩曰我送帝子秋水之涯碧天如夢千里平沙

古道無人獨鳴寒鴉江流東下夜鼓琵琶我特別淚飛
作霜花何以贈之蒼蒼蒹葭清風爲馬白雲爲車美人
往矣我歸其家仰視落月北斗橫斜詩成帝太悅命青
女酌酒賜予封姨歌於左嫋娥舞於右莎亭部落雜奏
清商之樂旣醉予拜辭帝曰吾無以酬子此去西方有
遊仙國國有飛蝶之城逐鹿之野朝雲之臺春草之池
其地差樂不似人間苦子歸矣他日朕召子主之遂呼
趾離送予出忽聞空庭落葉曉角一聲予遽然覺矣坐
而思之不得其故旣而笑曰豈非所謂秋夢者耶三中

子記